

### Anca na bruta simia pole fare on bel salto

Bon de ànema quelo che ga messo par scrito sta bela massima. Bon, parché de solito quando che se parla de bestie e de òmani, le bestie ghe ne vien sempre fora male.

Inte sto caso, invezze, la simieta vien doparà solo par fare on esenpio. El nostro nono el ghéa, forse, da consolare calche neódo se 'l se ga sentio de tirare fora on discorseto compagno.

La bellezza, el dise, no la xe tuto; ghe xe anca la bravura, e la bona grazia; ghe xe l'intelijenza e la stuzzia.

Me figura sto bocia che 'l sarà stà zo de suste e so nono se ne ga incorto. "Cossa gheto, caro?", el ghe gavarà dito; "la Giulietta me ga dito ca so' bruto e no la me vole pi", ghe gavarà risposto el toso sangiutando.

E cussì xe partia la fòla de consolazzion che po', a ben vardare, no la serve solo par tirare sù, ma la xe na verità sa-crossanta.

De salti so la vita bisogna fàrghene de ogni sorte, arquant'anca mortali, overossìa conpricà che no se sa se i vaga a refinire ben.

Chi che ga fiòi e on pochi de dèbiti lo sa ben cossa ca vojo dire.

Na volta che te si inbarcà in calche rogna, nissuni sta lì a vardare se te si belo o se te ghè calche difeto, sòi mi, el naso longo, le rece a svèntola o i bruschi. Tuti i salti, anca quili par fare cariera o par figurare ben sol to laóro, caro neodo, te sarè bon de farli anca se te si stralocio.

... Ben, se proprio te si stralocio xe mèjo che te ciapi le misure juste prima de saltare.

### El male de la pria xe el pezo male che ghe sia

La pria la sarìa la piera, e fin qua ghe semo...

Parcossa che la faga vegnere on male bruto, questo lo spiego sùito. Xe parché se la te casca so on piè la te schicia el déo grossso? Parché ciapà in testa no la xe proprio na carezza? Opure se la pria la pesa la te fa vegnere el "colpo della strega"?

Siornò, gnente de tuto questo.

El mal de la pria el xe on malano che ghe càpita a tanti so la vita, a calchedun mai e a altri pi de na volta.

I sintomi i taca a farse sentire el dì che uno el decide de fabricharse la casa, co le prime rabiade che te fa vegnere la mojere che la vole la cusina par cussì e cussì, el salolo de là, al camin largo, i balcuni e no le persiane, le matonele..., la scala..., i cupi...

Pensè a quante robe che bisogna... pensare par farse na casa, a parte el mutuo che '1 xe on efeto colaterale. Ben, quando ca ghi finio de pensare, pensè anca che dopo 'vergue pensa ocore passare ai fati. El xe el male de la pria.

E xe proprio passando ai fati che la freve la va a quaranta, parché el muraro vole l'anticipo, quelo d'i tubi, l'idraulico, el speta el muraro par tacare e questo el speta che scumizzia l'elettricisla par finire. E la fémena la te dà órdene de barufare col giòmetra e col posadore parché le piastrelle del bagno le xe viola invezze che violeta.

Mi la me xe passà la malatia, ma me xe restà chel fià de debolezza che quando che se ronpe calcossa in casa me vien sùito la freve. Disio che ghe sia on vacino?